



REPUBLIKA E SHQIPËRISË  
ENTI RREGULLATOR I SEKTORIT TË FURNIZIMIT ME UJË DHE  
LARGIMIT E PËRPUNIMIT TË UJËRAVE TË NDOTURA

KOMISIONI KOMBËTAR RREGULLATOR

VENDIM

Nr. 43, datë 05.10.2023

PËR

REFUZIMIN E APLIKIMIT TË SHOQËRISË RAJONALE UJËSJELLËS KANALIZIME  
BERAT SH.A. PËR NDRYSHIMIN E NIVELIT TARIFOR

Në mbështetje të nenit 13, 14, 21 dhe 22 të ligjit nr. 8102 datë 28.03.1996 "Për kuadrin rregullator të sektorit të furnizimit me ujë dhe largimit e përpunimit të ujërave të ndotura", i ndryshuar (ligji nr. 8102), vendimit të Komisionit Kombëtar Rregullator nr. 539, datë 30.12.2021 "Për miratimin e metodologjisë dhe procedurës për miratimin e tarifave të shërbimeve ujësjellës kanalizime" (vendimi i KKRR nr. 539) dhe vendimit të Komisionit Kombëtar Rregullator nr. 32, datë 13.09.2023, "Për një ndryshim në vendimin e KKRR nr. 28, datë 23.06.2023 "Për shtyrje afati të aplikimit nga shoqëritë ujësjellës kanalizime për tarifa të ujit të pijshëm dhe ujërave të ndotura për vitin 2023" (vendimi i KKRR nr. 32),

**Komisioni Kombëtar Rregullator,**

në mbledhjen e datës 05.10.2023, pasi shqyrtoi dokumentacionin e paraqitur nga Drejtoria Tekniko-Ekonomike dhe Drejtoria Juridike dhe Konsumatorit mbi kërkesën e Shoqërisë Rajonale Ujësjellës Kanalizime Berat sh.a. për miratimin e ndryshimit të nivelit tarifor për shërbimin e furnizimit me ujë dhe largimit të ujërave të ndotura,

**Konstatoi:**

1. Shoqëria Rajonale Ujësjellës Kanalizime Berat sh.a. (Shoqëria Rajonale UK Berat) me shkresën nr. 1327 prot. datë 29.09.2023, me lëndë "Kërkohej miratim për ndryshimin e tarifave për shërbimin e furnizimit me ujë të pijshëm dhe largimin e ujërave të ndotura dhe tarifës fikse të shërbimit në Rajonin Berat" ka paraqitur kërkesën pranë Entit Rregullator të Sektorit të Furnizimit me Ujë dhe Largimit e Përpunimit të Ujërave të Ndotura (ERRU) për rishikimin dhe unifikimin e nivelit tarifor për shërbimet ujësjellës kanalizime.
2. Komisioni Kombëtar Rregullator (KKRR) me vendimin nr. 11, datë 03.03.2023, "Për licencimin e Shoqërisë Rajonale Ujësjellës Kanalizime Berat sh.a." ka licencuar shoqërinë Rajonale UK Berat për ushtrimin e veprimtarisë së grumbullimit dhe shpërndarjes së ujit për konsum publik dhe largimin e ujërave të ndotura për një afat 4 vjeçar.
3. Në zbatim të pikës 1 të nenit 10 të Metodologjisë dhe procedurës për miratimin e tarifave të shërbimeve ujësjellës kanalizime, shoqëria Rajonale UK Berat në aplikimin për ndryshim të nivelit tarifor duhet të paraqesë dokumentacionin e mëposhtëm:

- a) Kërkesa zyrtare drejtuar ERRU për ndryshimin e tarifave për shërbimet ujësjellës, kanalizime dhe ITUN;
- b) Pasqyrat Financiare të vitit paraardhës certifikuar nga një Ekspert Kontabël i Autorizuar;
- c) Plani 5 Vjeçar i Biznesit, ku të paraqitet edhe programi investimeve dhe aseteve të reja, i cili do të hartohet në përputhje me formatin e aprovuar në këtë metodologji nga ERRU, që është i detyrueshëm vetëm për grupin e shoqërive që tentojnë të mbulojnë 100% të Kostove Totale;
- d) Modeli i aplikimit për nivelin e ri tarifor. Të gjitha tabelat e modelit paraqiten të printuara dhe të firmosura nga shoqëria dhe sipas formatit Excel të miratuar nga ERRU;
- e) Organigramë dhe përshkrimet e punës së stafit sipas pozicionit të tyre;
- f) Aktmarrëveshjet e kredisë midis shoqërisë dhe institucioneve kredi dhënëse, në rast se shoqëria është financuar me Hua dhe skema e planit mujor të shlyerjeve gjatë viteve të kaluara dhe viteve të ardhshme;
- g) Mendimin e Pushtetit Vendor për tarifën e propozuara të shprehura në vendimin përkatës dhe konfirmuar nga Prefekti i Qarkut për legjitimitetin e tij;
- h) Vendimi i Këshillit të Administrimit për miratimin e tarifave të propozuara;
- i) Proces Verbal i Seancave Dëgjimore me Publikun sipas formatit të përcaktuar nga ERRU;
- j) Subvencionet e përfituara nga operatori dhe ato të nevojshme gjatë periudhës rregullatore të tarifave të propozuara;
- k) Lejet ose Autorizimet për përdorimin e ujit për shoqëritë UK lëshuar nga Këshilli i Basenit Ujor të shoqëruara me Marrëveshjen ndërmjet shoqërisë UK dhe KBU për pagesën e tarifave për përdorimin e ujit;
- l) Raport i detajuar për gjendjen teknike të sistemeve të furnizimit me ujë dhe kanalizimeve të ujërave të ndotura, në të cilën të përshkruhet inventari i aseteve në përdorim të shoqërisë me të dhëna teknike (përmasat, lloji i materialit, vitit të instalimit/ndërtimit), përfshirë dhe prioritetet për zëvendësimin e tyre. Ky material do të hartohet sipas formatit të përcaktuar nga ERRU;
- m) Relacion analitik ekonomik për vitin paraardhës, si dhe për periudhën rregullatore që kërkohet ndryshimi i tarifave, në të cilën shprehet qartë justifikimi dhe argumentet përkatëse dhe objektivat e shoqërisë për përmirësimin e treguesve të punës;
- n) Në rast se shoqëria aplikon për tarifë shitje uji me shumicë, në kërkesën e saj për tarifa duhet të paraqesë: relacion teknik dhe ekonomik me llogaritjet e tarifës së shitjes së ujit me shumicë, miratimin e tarifës së kërkuar nga organet drejtuese si dhe akt marrëveshjet midis palëve shitës-blerës;
- o) Të ketë shlyer detyrimet për pagesën rregullatore sipas kontratës së nënshkruar midis ERRU dhe shoqërisë dhe në rast të detyrimeve të prapambetura të ketë shlyer sipas marrëveshjes së nënshkruar mes tyre për shlyerjen me këste të tyre;
- p) Deklarata për vërtetësinë dhe saktësinë e të dhënave sipas nenit 26 dhe nenit 46 të kësaj metodologjie.

4. Referuar kërkesës së Shoqërisë Rajonale UK Berat dhe dokumentacionit shoqëruar rezulton:

- a) Në dosjen e aplikimit mungojnë dokumentet si më poshtë:
  - Modeli i aplikimit për nivelin e ri tarifor;
  - Relacion analitik ekonomik për vitin paraardhës, si dhe për periudhën rregullatore që kërkohet ndryshimi i tarifave, në të cilën shprehet qartë justifikimi dhe argumentet përkatëse dhe objektivat e shoqërisë për përmirësimin e treguesve të punës;
  - Mendimi i Pushtetit Vendor për tarifën e propozuara;
  - Subvencionet e përfituara nga operatori dhe ato të nevojshme gjatë periudhës rregullatore të tarifave të propozuara;
  - Lejet ose Autorizimet për përdorimin e ujit për shoqëritë UK lëshuar nga Këshilli i Basenit Ujor.

- b) Problematika në dokumentet e paraqitura si më poshtë:
- Seancat dëgjimore me publikun – nuk janë respektuar procedurat e miratuara nga ERRU me vendimin e KKRR nr. 71, datë 21.09.2018, “Për miratimin e rregullores për organizimin dhe zhvillimin e seancës dëgjimore me publikun në procesin e miratimit të tarifave”, i ndryshuar, konkretisht nuk është respektuar afati i njoftimit dhe nuk është marrë miratimi i ERRU për prezantimin e propozimit, për rrjedhojë seancat janë zhvilluar pa pjesëmarrjen e përfaqësuesve të ERRU-së;
  - Vendimi i Këshillit Mbikëqyrës nr. 08, datë 28.08.2023 “Për miratimin e ndryshimit dhe unifikimit të tarifave UK për njësitë Berat, Kuçovë, Dimal, Poliçan dhe Skrapar” - mungon nënshkrimi i propozimit për nivelin e ri tarifor për secilën njësi.
- c) Pagesa rregullatore – Shoqëria UK Berat nuk ka respektuar Akt-Marrëveshjen për detyrimet e prapambetura të pagesës rregullatore.

Për gjithë sa më sipër dhe bazuar në parashikimin e pikës 2 të nenit 10 të Metodologjisë dhe procedurës për miratimin e tarifave të shërbimeve ujësjellës kanalizime, Komisioni Kombëtar Rregullator,

### **VENDOSI:**

1. Refuzimin e aplikimit të Shoqërisë Rajonale Ujësjellës Kanalizime Berat sh.a. për miratimin e ndryshimit të nivelit tarifor për shërbimet ujësjellës kanalizime.
2. Ngarkohet Drejtoria Tekniko-Ekonomike për njoftimin e shoqërisë Rajonale Ujësjellës Kanalizime Berat sh.a. për marrjen e këtij vendim.

Ky vendim hyn në fuqi menjëherë.

Ky vendim botohet në Fletoren Zyrtare.

**KRYETARI**

**Ndriçim Shani**